



Clotharius filius fuit Chilperici regis Sueffionum ex Fridegunda uxore. Patrem amisit natus quatuor menses, unde Gunthramus patruus rex Burgundiæ eum in suam tutelam recepit, atque omnibus uirtutibus honestè educauit. Eo autem defuncto cum Childeberto patruuele pro Burgundia ferè puer decertauit, atque uictoriam obtinuit. Interea Brunehildis scelere multi reges & principes Francorum inter sese committuntur & bello intestino intereunt, ita ut etiam nepotes Theobertus & Theodericus ab auia incensi, sese mutuò bello conficere, & quisq; solus rebus præesse statuerit. In eo bello Theodoricus à fratre in urbe Coloniensi occisus, & cū tota posteritate sublatus fuit. solo Sigisberto puero excepto, qui clam surreptus, in Franconiam Vuirzeburgum deportatus fuit. ex quo postea Habsburgensium familia celebris originem habuit. Hac ratione factum ut Clotharius in Francia, Burgundia, & Austrasia Monarcha factus, solus rerum potitus fuerit. Is ergo in Burgundiam cum exercitu profectus, Brunehildim pacificè ad se uocauit, atque eam increpatā, & indomitorū equorum pedibus ligatam, discerpi, & igne cremari iussit. sicq; illa ob ueneficia & uaria scelera pœnas dedit.